



ԳԵՐԱՇՆՈՐՀ Տ. ԿՈՄԻՏԱՍ ԵՊԻՍԿՈՊՈՍ ՏԵՐ-ՍՏԵՓԱՆՅԱՆ



Գերաշնորհ Տ. Կոմիտաս սրբազանը, ավազանի անունով Ստեփան, ծնվել է 1925 թվականին Սիրիայի մայրաքաղաք Դամասկոսում: Շատ չանցած ծնողների հետ վերահաստատվում է Ալեքսանդրիոսի, երբեմնի Հայոց ժոցի, Սովուզ-սու գյուղում, ուր անցնում է փոքրիկն Ստեփանի մանկությունը: Վաղ մանկական տարիքից նա զրկվում է ծնողական գորգուրանքից և մնում է որբ, ճանաչելով որբության դառնությունները: Փոքրիկն Ստեփանը իր բնածին քաղցր ձայ-

նով իր շուրջ ստեղծում է համակրանք և շրջապատվում է ժողովրդի սիրով և պաշտպանությամբ:

1938-1939 թվականներին, երբ Ալեքսանդրիոսի շրջանը (այժմ Սանդակ) անջատվելով Սիրիայից հանձնվում է Թուրքիային, փոքրիկն Ստեփանը բազմահազար գաղթականների հետ գաղթում է Լիբանան՝ Բեյրութ, ուր նա շարունակում է իր կիսատ մնացած ուսումը Աբգարյան վաժարանում:

1941 թվականին նա ընդունվում է Երուսաղեմի Սրբոց Հակոբյանց վանքի Ժառանգավորաց վարժարանում որպես ուսանող:

1945 թվականին փայլուն հաջողությամբ ավարտելով Ժառանգավորաց վարժարանի դասարանական բաժինը, սարկավազ է ձեռնադրվում ձեռամբ Տ. Կյուրեղ պատրիարքի:

Մինչև 1947 թվականի օգոստոս ամիսը սովորում է Ընթացարանում և նույն տարին ներգաղթում է Հայրենիք և երջանկահիշատակ Տ. Տ. Գևորգ Զ Կաթողիկոսի օրով ընդունվում է Մայր Աթոռի միաբանության շարքում որպես սարկավազ:

1951 թվականին նա կուսակրոն քահանա է ձեռնադրվում Ս. Էջմիածնի Մայր Տաճարում և իր գեղեցիկ ձայնի համար վերանվանվում Տ. Կոմիտաս աբեղա:

Ապա երիտասարդ հոգևորականի առաջ բացվում է վանական-վարչական գործունեության լայն ուղի: Նա ձեռնհասորեն վարում է Ս. Գեղարդի վանքի վանահայրությունը: 1952—1954 թվականներին պաշտոնավարում է Թբիլիսիում և Բաքվում որպես Հոգևոր հովիվ, արժանանալով ժողովրդի ջերմ սիրույն և վանական իշխանության դնահատանքին:

1954—1955 թվականներին պաշտոնավարում է Մայր Աթոռում որպես երաժշտության դասատու Հոգևոր Ճեմարանի և փոխ-լուսարարապետ Մայր Տաճարի:

Նորին Ա. Օծոթյուն Վազգեն Ա Հայրապետի ընտրությունից հետո նշանակվում է նաև դավազանակիր Վեհափառ Հայրապետի:

1956 թվականի հունվարից նշանակվում է պատմական Շիրակի թեմի առաջնորդական փոխանորդ, ուր ծավալում է շատ բեղուն գործունեություն՝ կազմակերպելով թեմի ազգային-եկեղեցական կյանքը:

1957 թվականի մայիսից Վեհափառ Հայրապետը, գնահատելով Տ. Կոմիտաս վար-

դապետի ազգանվեր գործունեությունը, նրան նշանակում է վրահայոց թեմի առաջնորդ:

1957 թվականի նոյեմբերի 24-ին, վրահայոց թեմական խորհրդի միջնորդությամբ, ձեռնադրվում է եպիսկոպոս վրահայոց թեմի վրա:

Տ. Կոմիտաս սրբազանը մեր խոստումնալից՝ և երիտասարդ հոգևորականներից է, որի առաջ բացվում է ազգային-եկեղեցական գործունեության ընդարձակ ասպարեզ:

Վստահ ենք, որ սրբազանը, իր բարեմույն ընավորությամբ և նվիրումով, կարդարացնի Վեհափառ Հայրապետի բարձր վստահությունը և իր հավատացյալ ժողովրդի սերը:

